

# Tenutas religiosas en l'Europa

## Perscrutaziuns normadas en quindesch pajais

DA GUIU SOBIELA-CAANITZ

■ «Tge pensas da la religiu?» Avant var dus tschientaners ha Johann Wolfgang von Goethe (1749–1832) mess questa dumonda en la bucca da sia Gretchen. Oz vegn la religiusadad perscrutada d'in entir rom da la sociologia. Dapi la fin dal 20avel tschientaner cumparan reschertgas che pussibiliteschan da cumparegliar differents pajais areguard la tenuta religiosa. Tenor criteris normads han ins perscrutà 1990 25 pajais europeics e 1999 30; tranter ils tschintg resguardads pir 1999 sa chattan trais ortodoxs, numnadamain la Grezia, la Rumenia e l'Ucraina. Il sociolog polac Tadeusz Szawiel ha gist publictà in'analisa ordvart condensada (1) basada sin ils resultats da 15 pajais, numnadamain ils trais menziunads, l'Austria, Frantscha, Germania (pajais federativs vegls e novs), Gronda Bretagna, l'Irlanda, l'Italia, ils Pajais bass, la Pologna, Slovachia, Spagna, Tschechia ed Ungaria. Ils resultats na lubeschan betg da definir tendenzas unifurmas. Pir l'examinaziun separada da mintga singul cas pudess gidar a l'interpretar.

### Duas gruppas da pajais

L'emprima dumonda è simpla: «Essas vus religios, religiusamain indifferent u ateist?» Già 1990 distinguev'ins pajais ferm indifferentes cun blers ateists (Frantscha, Germania antruras communista e Tschechia) e quels, tuts catolics, cun var 2/3 da persunas religiusas (Austria, Irlanda, Italia, Pologna, Slovachia e Spagna). Nov onns pli tard era la religiusadad ferm diminuida en Gronda Bretagna (da 54 a 42%) e creschida en Slovachia (da 69 a 82%) sco er en ils vegls pajais federativs tudestgs (da 54 a 62%) e l'Austria (da 70 a 79%). Be en la Republica democratica tudestga (RDT), svanida 1990, ed en

Tschechia ha il communissem «sragischà cun success las identitads religiusas» (p. 21) che han uschiglio survivì la dictatura ateista; 1999 sa definivan 75% dals Ucrainais e 85% dals Rumens sco religios. Las cifras da 1999 zavran tranter duas gruppas da vegliadetgna, ina da 18 a 29 onns e l'autra davent da 30 onns; en tuts pajais resguardads, dano l'Ucraina, è l'emprima main religiosa e pli ateista che la segunda. Szawiel: «En Grezia, Spagna, Gronda Bretagna e la Germania federala 'veglia' è la differenza tranter las duas gruppas da vegliadetgna uschè gronda ch'ella po signifitgar in chal d'identitad religiosa en l'avegnir da quests pajais» (p. 22).

### Nua vala Dieu en la vita da l'uman?

La segunda dumonda da la perscrutaziun pertutga la pratica religiosa: «Ils pajais pauc attaschads a baselgias tradiziunalas èn ils medems nua ch'ins professa main religiusadad, numnadamain l'anteriura RDT e la Tschechia, plinavant la Frantscha, Gronda Bretagna ed Ungaria. L'attaschadad la pli derasada chatt'ins puspè en pajais catolics, numnadamain l'Irlanda, l'Italia, Pologna, Slovachia e Spagna (...). En Slovachia ha la pratica religiosa creschida en moda relevanta tranter 1990 e 1999» (pp. 23–24); quai deriva segir da la fin dal communissem che persequitava ferm la Baselgia catolica en Slovachia. La terza dumonda, fatga pir 1999, pertutga la frequenza da l'uraziun; la quarta e davosa dumonda tuna: «Quant relevant è Dieu en vossa vita?» e pretenda ch'ins respondia cun ina nota tranter 0 (nagina relevanza) e 10 (fitg impurtant). Szawiel: «Ord pajais catolics sa drizzan Polacs, Irlandais e Talians a Dieu fitg savens en lur vitas, sco era ils Grecs e Rumens ord pajais ortodoxs; il pli pauc fan quai ils

Tudestgs ord l'anteriura RDT, Franzos e Tschecs (...). Cumparegliand ils onns 1990 e 1999, percorsch'ins paucas midadas tar la dumonda davart la relevanza da Dieu en la vita; qua datti trais excepziuns. In chal datti en Tschechia ed ils pajais tudestgs antruras communistas; perencunter registrais en Slovachia in augment spectacular» (p. 26).

### Nua prevala l'ateissem?

Co duain ins interpretar tut quai? Ins po dar explicaziuns parzias almain areguard cas extremis. La mendra religiusadad da Frantscha deriva segir da l'anticlericalissem avert e l'ateissem zuppà dal stadi, cunzunt a la fin dal 19avel tschientaner ed enfin a 1940. Il minister franzos da l'educaziun ha concedi 1904: «La neutralitad [religiusa] è adina stada ina manzegna forza necessaria» (2). Ils 8 d'october 1906 ha il medem politicher, vegnì entant minister da lavur, punctuà avant la Chombra da deputads: «Nus avain ans dà fadia da promover l'anticlericalissem e l'irreligiusadad. Nus avain sragischà la cardientscha da las schientschas umanas (...). En il tschiel avainsa stizzà glischs ch'ins n'envida mai pli» (3). 240 deputads encunter 128 han lura decidì che lez pled ministerial duaja vegnir affischà en mintga vischnanca da Frantscha. 1918 ha Paris gidà ad instituir la Tschechoslovachia sco in dubel da Frantscha, in stadi centralisà ed ateist basà sin il mitus d'in «pievel tschechoslovac». Rotschas da funcziunaris tschecs èn rivadas en Slovachia, «nua ch'ins prendeva savens en mal lur indifferenza religiosa evidenta e schizunt lur mancanza da respect en lez regard» (4). La differenza da tenuta religiosa è stada in motiv essenzial da las divergenzas tranter ils dus pievels. Ins duai anc declarar il success da l'ateissem communist en

quella part da Germania ch'è tutina stada la tgina da la reformaziun e dals chorals evangelics. Ma gist il protestantissem tudestg è stà profundamain spussà dal naziunalsocialissem che ha promovì il moviment vasal dals «Cristians tudestgs». Il reschim ha mazza opponents curaschus sco il teolog profetic Dietrich Bonhoeffer (1906–1945). Suentar la guerra ha il protestantissem pudì sa referar en la Germania federala, dentant betg en la RDT comunista; en ils tschintg pajais federativs novs è'l be pli ina minoritad. Ils plis catolics da lez intschess derivan da fugitivs da Silesia e d'autras cuntradas antruras prussianas. Perencunter deriva l'attaschadad dal pievel slovac a la Baselgia catolica segir da la popularitad da lezza cur ch'il pajais viveva sut ils naziunalsissem ungarais (enfin a 1918) e tschec e lura sut il communissem. Las perscrutaziuns resumadas da Szawiel davart quindesch pajais stimolassan da manegiar che l'avegnir dal cristianissem en l'Europa dependia per gronda part da pajais uschè differents sco l'Austria, l'Irlanda, l'Italia, la Pologna, la Rumenia, la Slovachia e l'Ucraina. Ma pussaivels èn dapertut tant indebliments sco era resvegli religios, e tals resvegli pudessan era succeder tranter ils milliuns musulmans da noss continent. Co vai vinavant?

1) Tadeusz Szawiel, Glaube und Kirche en Europa, en: «Ost-West. Europäische Perspektiven» 2003/1, pp. 18–27. Adressa: Matthias-Grünwald-Verlag, Max-Hufschmid-Straße 4a, D-55130 Magonza. Fax 0049 6131 9286-26. Posta electronica: mail@gruenewaldverlag.de

2) Cità en: François Brigneau, Jules l'impos- teur, F-81102 Castres (Présent) 1981, p. 123.

3) Cità en: François Brigneau (sco nota 2), p. 124.

4) Pavol Petruf, La Slovaquie. Paris (puf, ISBN 2 13 049151 0) 1998, p. 48.